

吐血第一

《巢氏病源》小兒吐血候：小兒吐血者，是有熱氣盛而血虛，熱乘於血，血性得熱則流散妄行，氣逆即血隨氣上，故令吐血也。

錢乙論補下不同云：段齋郎子四歲，病嗽，身熱，吐痰數日而咯血。醫以桔梗湯及防己丸治之不愈，其涎上攻，吐喘不止，請錢氏，下褊銀丸一大服（方見痰涎門中），複以補肺散、補脾散治之（方見胃氣不和門中）。今段氏咯血肺虛，何以下之？曰：肺雖咯血，有熱故也。久即虛痿，今涎上潮而吐，當下其涎，若使不吐涎為甚便也。蓋吐涎能虛，又生驚也。痰實上攻，亦使發搐，故依法只宜先下痰，後補脾肺，必涎止而吐愈。若先補其肺為逆，先下其痰為順，先下後補為良也。

《嬰童寶鑑》小兒吐血歌：

血為榮兮氣為衛，二氣相隨無住滯。忽然血動氣來沖，便是妄行忘本位。血隨氣上奔心來，吐出如屠爭忍視。便須服藥好看承，解熱且令依次第。

《千金》治小兒吐血方。

上用燒蛇蛻皮末，以乳服之。並治重舌。

《千金》又方

上取油三分，酒一分，和之。分再服。

《簡要濟眾》治小兒吐血不止方。

上蒲黃細研。每服半錢，用生地黃汁調下。量兒大小加減進之。

《簡要濟眾》治小兒吐血不止方。

上用黃連一兩，去鬚，搗為散。每服一錢，水七分，入豉二十粒，同煎至五分，去滓，溫服。量兒大小加減進之。

《聖惠》治小兒四、五歲以上非時吐血，犀角散方

犀角（屑） 梔子仁 生熟地黃 子芩 紫參 刺薊（各一分）

上件藥搗，粗羅為散。每服一錢，以水一小盞，煎至五分，去滓，不計時候，溫服。量兒大小加減服之。

《聖惠》治小兒吐血不止，蒲黃散方

蒲黃 亂髮（灰。各一分） 伏龍肝（半兩）

上件藥，同研令勻細。不計時候，暖生地黃汁調下半錢。量兒大小加減服之。

《聖惠》治小兒吐血，心躁煩悶。茜根散方

茜根(半兩) 犀角(屑) 川升麻 川大黃(銼, 微炒) 黃芩 甘草(炙微赤, 銼。以上各一分)  
上件藥搗, 粗羅為散。每服一錢, 以水一小盞, 入黑豆三十粒, 淡竹茹半分, 煎至六分, 去滓, 不計時候。量兒大小, 以意加減溫服。

《聖惠》又方

刺薊(自然汁不限多少)

上件藥取汁一合, 暖令溫。不計時候, 調下元明粉半錢, 量兒大小以意加減。

《聖惠》又方

上取生地黃汁一合, 暖令溫。調下面塵半錢, 不計時候, 量兒大小, 以意加減溫服。

《聖惠》又方

上以亂髮燒灰, 細研。每服以溫水調下一字。張銳《雞峰方》以米飲調下。

《嬰孺》治少小咳唾中有血, 款冬湯方

款冬花 乾薑 阿膠(炙。各二兩) 吳茱萸(一升) 桂心(五寸) 艾(雞子大) 鯉魚(一條, 長一尺二寸)  
上研細, 酒和置魚肚中, 銅器中蒸熟, 取汁。大人服一升, 小兒一合, 以意裁之。

《嬰孺》治少小咳逆, 甚者血出鼻衄。豚肺散方

上以豚肺, 好酒浸一宿, 平旦取, 炙乾為末。一服一撮飲下。

《嬰孺》治小兒熱病, 鼻衄或唾血。升麻湯方

升麻(八分) 淡竹青皮 羚羊角(各五分) 生地黃(七分) 甘草(四分) 芍藥(六分)  
上以水三升煮一升。一歲兒為三服。

《嬰孺》治小兒汁出如漿, 衄血、吐血、小便出血, 垂死者方。

都梁香 乾地(各二兩) 紫菀 桂心 人參 青竹葉 菴蓉(各一兩)  
上為末。酒服方寸匕, 日進三服, 夜一服, 可至二七。

張渙治小兒內有邪熱, 血流散妄行, 若氣逆即血隨氣上, 或口中吐血, 鼻中衄血。紫參散方

紫參 生乾地黃 山梔子(各一兩) 刺薊 亂髮(各燒灰, 一分)  
以上搗羅為細末, 次用: 蒲黃 伏龍肝(各細研。一分)  
上件都拌勻。每服半錢至一錢, 煎竹茹湯調下。

張銳《雞峰方》治吐血。

上用伏龍肝末。每服二錢, 水一盞, 同煎至六分, 去滓, 溫服, 不以時。

張銳《雞峰方》治吐血衄血。

上用白茅花, 每服秤一錢, 水一盞, 同煎至六分, 去滓, 溫服, 不以時。

張銳《雞峰》又方

上用新綿燒灰，研細。每服一錢，旋入少粗香，溫酒調下，米飲亦可。

《王氏手集》**青金散** 治肺嗽，喘息有音及熱搏上焦，血溢妄行，咳唾血出，咽噎疼痛，煩渴、嘔吐，寒熱休歇，減食羸瘦方。

白芨 青黛(研。各半兩)

上同研勻。每服半錢或一錢，糯米飲調下。

## 嗽血第二

《王氏手集》**解肌丸** 治外搏風邪，內挾痰飲，寒熱往來，煩渴頰赤，心忪減食，熱在上焦，咳嗽有血方。

防風 地骨皮(各一分)

上件燒沙糖為丸。每服一丸，食後煎紫蘇湯下。

《王氏手集》**丸參丸** 治嗽血方。

阿膠 皂兒黃 人參(各半兩)

上件膠為細末。湯少許，烱膠和如雞頭大，白湯化下。

《朱氏家傳》治咳嗽出血下涎**雞清散方**

鬱金(半兩，用皂莢漿水一盞或酸菜汁亦得，煮乾為度) 滑石(半兩，生) 雄黃(半兩，醋煮半乾用) 上為細末。每服一字，常服，薄荷湯調下。止嗽，螺粉水下；嗽血，雞子清調下。

## 鼻衄第三

《巢氏病源》小兒鼻衄候：小兒經脈血氣有熱，喜令鼻衄。夫血之隨氣，循行經脈，通游腑臟。若冷熱調和，行必依其常度，無有壅滯，亦不流溢也。血性得寒，即凝澀結聚，得熱即流散妄行。小兒熱盛者，熱乘於血，血隨氣發溢於鼻者，謂之鼻衄。凡人血虛受熱，即血失其常度，發溢漫行，乃至發於七竅，謂之大衄也。

《千金翼》：脈浮發熱，口乾鼻燥，能食者即衄。

《嬰童寶鑒》：小兒心熱，肺氣貫血，隨熱入肺經，為鼻衄。

《惠濟》論小兒鼻衄候歌：

欲衄之候脈弦洪，鼻中乾燥響如風。氣衝積血停留肺，臟腑煩冤邪脈攻。數合出紅猶可治，更加升斗命須終。明師若欲知調治，涼血清胸始有功。(清胸，清肺也。)

《葛氏肘後》療人少小亟鼻衄，小勞輒出方。

上用桑耳無多少，熬令焦，搗下篩。每衄發，輒以杏仁大塞鼻數度，即可斷。《外台》法燒用為丸，以內亦得。

《仙人水鑿》小兒百日內鼻中出血方。

葵花一字急吹之，白礬水浴更相宜。此是鼻風不消藥，莫教虛懼奶頭兒。

《外台》：《古今錄驗》療小兒鼻衄不止方。

上以馬矢綿裹塞鼻孔中。

《外台》：《古今錄驗》又方

上燒髮灰為末，吹鼻孔中亦佳。《本草》、《聖惠》、《嬰孺》法同，甚妙。

《外台》：《古今錄驗》又方

上單服白馬屎汁三合，甚良。

《外台》：深師治少小衄血方。

桂心(十八銖) 亂髮(洗，燒灰) 乾薑(各六銖)

上三味，搗篩為散。服方寸匕，日再。

《聖惠》治小兒鼻衄或唾血。升麻散方

川升麻(半兩) 羚羊角(屑) 甘草(炙微赤，銼) 黃芩 赤芍藥(以上各一分)

上件藥搗，粗羅為散。每服一錢，以水一小盞，入淡竹葉七片，煎至五分，去滓，入地黃汁半合，更煎一兩沸，不計時候。量兒大小分減溫服。

《聖惠》治小兒鼻衄不止，生地黃煎方

生地黃 刺薊(各取汁半斤) 蜜(一合) 杏仁(一兩，湯浸去皮尖，雙仁，麩炒黃，別研) 阿膠(半兩，搗碎，炒令黃燥為末)

上件藥，都入銀鍋中，以慢火熬為膏，不計時候，用新汲水調下一錢。量兒大小加減服之。

《聖惠》又方

刺薊 蒲黃(各半兩) 亂髮(灰，一分)

上件藥搗，細羅為散。每服以冷水調下半錢，不計時候。量兒大小加減服之。

《聖惠》治小兒鼻衄不止方。

亂髮(灰，半兩) 伏龍肝(一兩)

上件藥都研令勻。不計時候，以新汲水調下半錢。量兒大小以意加減。

《聖惠》又方

刺薊汁(二合) 地黃汁(一合) 生薑汁(少許)  
上調和令勻。徐徐服半合，仍將滓塞鼻中，即瘥。

《聖惠》又方

上炒桑耳，令焦熟，搗細羅為散。不計時候，以冷水調下半錢，亦吹少許於鼻中。量兒大小以意加減。

《譚氏殊聖》方：小兒鼻衄數還啼，顏色青黃漸改移，忽爾發時饒莽躁，連忙走起索東西。只緣積熱三焦壅，凝水川消貝母知，更取荷衣煎五合，蜜調頓服定無凝。

凝波散

寒水石 貝母 知母(為末。各一分半) 馬牙硝(細研，川硝亦得。各一分) 荷葉(一兩，以水一升煮五七沸，濾乾，焙)  
上為末。每服半錢，蜜水調下。

茅先生治小兒鼻血出方。

山梔仁(半兩，半生，半炒) 陳槐花(一分)  
上同為末，用熟水調下半錢。《聖惠方》同，只槐花微炒，梔子不炒。

張渙 抵聖散 治不以疾病鼻衄不止方。

盆硝(研) 亂頭發(燒灰，研) 紅藍花(取末。各一分)  
上同研勻細。以綿纏，藥塞鼻中。

張渙 槐花散 治衄血方。

槐花(一兩，炒) 蒲黃(半兩) 川面薑(一分)  
上件搗，羅為細末。每服半錢，新水調下。

張銳《雞峰》方治衄血。  
上每用石榴花末一字許，搯鼻內。

張銳《雞峰》又方  
上每用龍骨末少許，吹鼻中。

《惠眼觀証》調英散 治衄血不止方。

血餘(父母者上者一團，用綠竹筍殼一片，裹燒過)  
上為末。每服半錢或一錢，新汲井花水下。

《吉氏家傳》黃藥散 治小兒鼻衄不止方。

上黃藥一味，為細末。每服半錢或一錢，井水調下。

#### 大便血第四

《聖惠》：夫小兒大便血者，為心主於血脈，心臟有熱，熱乘於血，血性得熱，流散妄行，不依常度，其血流滲於大腸者，故令大便血出也。

《千金》治大便訖出血方。

上用鱉頭一枚，炙令黃黑，末之，以飯下五分七，多少量兒大小，日三服。《外台》鱉甲一枚，炙末水調。

《千金》又方

上燒車 一枚令赤，內一升水中，分二服。

《千金》又方

上燒甌蒂末，敷乳頭上，令兒飲之。

《仙人水鑿》小孩子遺血，呼為胎風，宜使此方。人多不識，每因上廁犯之，至三歲以上，解行後有少鮮血，宜用此散子方。胎腸風最惡，日久殺孩兒。如後有鮮血，宜取一甘梨，梨內安琥珀，並密封燒之。宜待交梨碎，取研救孩兒。

上取一顆好梨，去心入少許琥珀末並蜜，即以面裹泥球之火中 一伏時，取出去皮，研，以水調服立效。

《子母秘錄》治小兒下血。

上取雌雞翅下血服之。

《聖惠》治小兒大便出血，體熱黃瘦，不欲飲食。**羚羊角散方**

羚羊角(屑) 黃耆(銼) 川升麻 黃芩 甘草(炙微赤，銼) 地榆(銼。以上各一分) 生乾地黃(半兩)  
上件藥搗，粗羅為散。每服一錢，以水一小盞，入苦竹茹半分，煎至六分，去滓，不計時候。量兒大小分減溫服。

《聖惠》治小兒大便出血，腹痛黃瘦，不欲飲食。**槐花散方**

槐花(微炒) 白朮 熟乾地黃 芎 (以上各半兩) 黃耆(銼) 木香 當歸(銼，微炒) 甘草(炙微赤，銼。以上各一分)

上件藥搗，粗羅為散。每服一錢，以水一小盞，煎至六分，去滓，不計時候。量兒大小分減溫服。

《聖惠》治小兒大便出血，久不止，面色痿黃，肌體羸瘦或時腹痛，不欲飲食。**卷柏丸方**

卷柏 阿膠(搗碎，炒令黃燥) 赤石脂(各一兩) 槐花(炒) 黃牛角(炙焦) 當歸(銼，炒) 黃耆(銼) 芎(各一兩)

上件藥搗羅為末，煉蜜和丸如麻子大。三歲兒，每服以粥飲下七丸，日三服。量兒大小以意加減。

《聖惠》又方

上用鹿角燒灰細研，以粥飲調下半錢，日三服。量兒大小以意增減。《嬰孺》方，刮屑米飲服。

太醫局 沒石子丸 治小兒腸虛，受熱下利，鮮血或便赤汁，腹痛後重，晝夜不止，遍數頻多方。

沒石子 地榆(各半兩) 黃連(銼，炒，一兩半) 黃柏(銼碎，蜜炒，二兩) 酸石榴皮(一兩)  
上件搗羅為細末，以醋煮麵糊，和丸如麻子大。每服十丸至二十丸，溫米飲下，食前服。

茅先生治小兒大便下血方。

枳殼(去白，面炒) 荊芥穗 甘草(各等分)  
上為末。每服一錢，用陳米飲調下。

《九 衛生》紫參散 療小兒下血痛方。

臭椿根皮 貫眾 紫參 酸石榴皮(燒灰存性。各等分)  
上同為細末。每服一錢，米飲調下。腹痛煎艾湯調下。

《孔氏家傳》治小兒大腸有血，上後有血如痢疾相似，但不拘十歲以上皆神效散方。

芍藥 地榆 甘草(炙) 陳橘皮 黃連 乾葛(以上各等分)  
上為末。每服一錢，用陳米飲調下，日進三服。

《孔氏家傳》治小兒便鮮血槐花散方

黃耆(一兩) 當歸 槐花 白朮 人參 芍藥(各三分)  
上為末。米飲下一錢，小兒半錢。

《吉氏家傳》治瀉血不定，是脾胃氣冷，大腸風毒，宜服此方。

沒石子(一個大者) 肉豆蔻(一個) 茶末(一錢) 桑根白皮(二錢，炙)  
上件末，不計時候，以水如茶點一錢灌服立瘥。

《朱氏家傳》小兒熱氣攻大腸，其病瀉血，臟腑疼痛，漸如茶色難治。此病是傷寒出汗不盡，或因瘡子出不足，令熱氣行於大腸，所以瀉血。如活，先解汗，後下氣。攻大腸散方

鬱金(一兩) 乾薑(半兩) 大腹皮(一兩半)  
上為末。每服半錢，陳米飲下。

## 小便血第五

《巢氏病源》小兒尿血候：血性得寒則凝澀，得熱則流散。而心主於血，小兒心臟有熱，乘於血，血滲於小腸，故尿血也。

《千金》治小兒尿血方。

上燒鵲巢灰，并華水服之。亦治尿床。《嬰孺》治大便血。

姚和眾治小兒尿血方。

上用甘草五分，以水六合，煎取二合，去滓。一歲兒一日服，令盡。

姚和眾又方

上用蜀升麻五分，水五合，煎取一合，去滓。一歲兒一日服盡。

《聖惠》治小兒尿血，水道中澀痛。阿膠散方

阿膠(一兩，搗碎，炒令黃燥) 黃芩 梔子仁 甘草(炙微赤，銼) 車前子(各一分)  
上件藥搗，細羅為散。每服用新汲水調下半錢，日三四服。量兒大小以意加減。

《聖惠》又方

榆白皮 生乾地黃(各半兩) 甘草(一分，炙微赤，銼)  
上件藥都細銼。以水一小盞，煎至六分，去滓，溫服，量兒大小以意加減。

《聖惠》又方

苦楝子(一兩) 鬱金(二枚，一枚泡，一枚生用)  
上件藥搗，細羅為散。每服煎蔥湯調下半錢，量兒大小以意加減。

《聖惠》又方

生乾地黃 黃芩(以上各半兩)  
上件藥搗，粗羅為散。每服一錢，以水一小盞，煎至六分，去滓，溫服，半合。量兒大小加減服之。

《聖惠》又方

紫菀(洗去苗土) 甘草(炙，銼) 黃連(去鬚。各一分)  
上件藥搗，粗羅為散。每服一錢，以水一小盞，入豉三十粒，煎至五分，去滓。量兒大小分減服之。

《聖惠》又方

葵子 車前葉 甘草(炙) 川朴硝(各一分)  
上件藥搗，粗羅為散。每服一錢，以水一小盞，煎至五分，去滓。量兒大小分減，溫服。

《聖惠》又方

上用牛蒡根洗去土，搗，絞取汁一中盞，入生蜜一合，相和令勻。每服半合，日三、四服。量兒大小加減服之。

《聖惠》又方

上取蒲黃末，以溫水調下半錢。量兒大小加減服之。

### 《聖惠》又方

車前葉(半斤, 搗, 絞取汁) 沙糖(一兩)  
上件藥, 相和令勻。每服半合, 量兒大小加減服之。

### 《聖惠》又方

上以生地黃汁, 每服暖一合服之。量兒大小以意加減。

茅先生治小兒小便下血方。

生地黃汁(小半盞) 輕粉(半錢七)  
上作一服, 用井花水下。

張渙 車前散 治熱盛積於小腸, 甚則尿血方。

牡蠣(半兩, 燒為粉) 車前子 甘草(炙微赤, 銼) 川朴硝(以上各一分)  
上件藥搗, 羅為散。每服一錢, 以水一小盞, 煎至五分, 去滓, 溫服。量兒大小加減, 不拘時候。

### 《吉氏家傳》尿血地黃散方

綠豆粉 滑石(各一兩) 甘草(半兩, 炙)  
上末, 此病小兒是心臟積熱, 並脾臟、肝臟積熱。如大人脾臟受病傳腎, 有三陰三陽之脈, 小兒八歲以下只有三陽之脈, 無三陰脈。所以心、脾、肝三臟受病, 不傳腎臟傳小腸, 小腸風熱之極, 所以尿血。每服半錢, 新汲水下二錢, 二服止。忌熱食、酸、鹹。

《千金》灸法：尿血, 灸第七椎兩旁各五寸, 隨年壯。

## 大便不通第六

《巢氏病源》小兒大便不通候：小兒大便不通者，腑臟有熱，乘於大腸故也。脾胃為水穀之海，水穀之精化為血氣，其糟粕行於大腸。若三焦五臟不調和，熱氣歸於大腸，熱實，故大便燥澀不通也。

《外台》：《千金》紫雙丸 主小兒身熱頭痛，食飲不消，腹脹滿，或小腹絞痛，大小便不利，或重下數起。小兒無異疾，惟飲食過度，不知自止，哺乳失節，或驚悸寒熱，惟此丸治之，不瘥，複可再服。小兒欲下，是其蒸候，哺食減少，氣息不快，夜啼不眠，是腹內不調，悉宜用此丸，不用他藥，數用神驗。《千金》不傳方。

巴豆(去皮心, 熬) 蕤核仁(各十八銖, 別搗) 麥門冬(十銖, 去心) 甘草(五銖, 炙) 甘遂 真朱(各二銖) 牡蠣(熬) 臘(各八銖)

上八味, 以湯熟洗巴豆, 研, 以新布絞去油。別搗甘遂、甘草、牡蠣、麥門冬, 細篩畢; 搗巴豆、蕤仁令極熟, 乃納諸藥散, 更搗三千杵。如藥燥, 入少蜜。足之半歲兒可服如荏子一雙; 一、二歲兒服如半麻子作一雙; 三歲兒服如麻子一枚作一雙; 四歲兒服如麻子二丸; 五、六歲兒服如大麻子二丸; 七、八歲兒服如小豆二丸; 九歲、十歲兒微大於小豆二丸。常以雞鳴時服, 至日出時不下者, 飲熱粥汁數合即下, 丸皆雙出也。下甚者, 飲冷粥止之。

《外台》：《必效》療小兒大便不通方。

上用豬苓一兩，以水少許，煮雞屎白一錢七與服，立瘥。

《聖惠》治小兒臟腑壅熱，心神煩躁，大便不通。**大黃散方**

川大黃(銼，微炒) 紅雪(各一兩) 犀角(屑) 川升麻(各半兩) 當歸 甘草(炙微赤，銼) 赤芍藥(各一分)

上件藥搗，粗羅為散。每服一錢，以水一小盞，煎至六分，去滓，三、四歲溫服一合。量兒大小加減服之。日三、四服，以利為度。

《聖惠》治小兒大便不通，腹脅妨悶。**芎黃散方**

芎(半兩) 川大黃(銼，微炒) 郁李仁(湯浸，去皮微炒。各三分)

上件藥搗，細羅為散。每服一錢，以溫水半盞調服。量兒大小以意分減，以利為度。張渙兼治大小便不通。

《聖惠》又方

甘草(炙微赤，銼) 陳橘皮(湯浸，去皮瓢，焙。各一分) 牽牛子(微炒) 川大黃(銼，微炒。各半兩)

上件藥搗，細羅為散。每服煎蔥白湯調下半錢。量兒大小以意加減。日三、兩服，以效為度。

《聖惠》治小兒大便不通，心神煩熱，臥忽多驚，腹脅妨悶。**丹砂丸方**

丹砂(半兩，研細，水飛過) 續隨子(三分) 膩粉(一錢)

上件藥都細研令勻，煉蜜和丸如綠豆大。三歲兒每服以溫水下三丸。量兒大小，以意加減服之。張渙兼治大小便不通。

《聖惠》治小兒大便不通，心腹壅悶，臥即煩喘。**通中丸方**

巴豆霜(二分) 皂莢(不 者去皮、子，燒令焦黑) 川大黃(銼，微炒。各一兩)

上件藥大黃、皂莢搗羅為末，入巴豆霜同研令勻，煉蜜和丸如綠豆大。四、五歲兒以溫水下三丸。量兒大小以意加減。

《聖惠》治小兒臟腑壅滯，腹脅妨悶，大便不通。**犀角丸方**

犀角(屑) 當歸(銼，炒) 丹砂(細研，水飛過。各半兩) 巴豆(十粒，去皮、心，研，紙裹，壓去油) 川大黃(一兩，銼，炒)

上件藥搗，羅為末，入巴豆、丹砂同研令勻，煉蜜和丸如綠豆大。三歲兒以溫水下三丸。量兒大小以意加減。

《聖惠》治小兒大便不通，心腹壅悶。**大黃丸方**

川大黃(一兩，銼、炒) 枳殼(麩炒) 梔子仁 郁李仁(湯浸，去皮，炒。各三分)

上件藥搗，羅為末，煉蜜和丸如麻子大。每服以熱水下五丸。量兒大小加減服之。

《聖惠》治小兒大便不通，臍腹妨悶，宜用桃葉湯方

桃葉(一握) 木通(二兩) 燈心(五大束) 川朴硝(一兩) 蔥白(七莖)

上件藥細銼，用醋漿水三大碗，煎十餘沸，去滓，傾向盆中，稍溫，便坐兒在盆內。將滓以手帕裹熨於臍下，冷即出之，後吃地黃稀粥半盞，良久便通。

《聖惠》治小兒大便不通，連腰滿悶，氣急困重，宜用走馬煎方

羊膽(一枚) 蜜(一合) 鹽花(半兩)

上件藥同煎如餳，捻如箸粗，可長一寸，內下部中，須臾即通。

《聖惠》治小兒大便不通，心中煩熱。牛黃丸方

牛黃(一錢，細研) 川大黃(三錢，銼，微炒，搗、羅為末)

上件藥都研令勻，煉蜜和丸如麻子大。每服以粥飲下七丸，以利為度。量兒大小加減服之。

《聖惠》治小兒大便五、六日不通，心腹煩滿，宜用此方。

上取青顆鹽末於臍中，以手摩良久即通。大人用之亦得。《嬰孺》方同，止內下部中，手熱摩之。

《聖惠》治小兒卒大便不通蜂房散方

上用蜂房一枚，炙令微焦，搗、細羅為散。每服以粥飲調下半錢。量兒大小加減服之。《葛氏肘後》、《嬰孺》方同。《嬰孺》以酒調少許。

茅先生治小兒大便不通方。

朴硝(三錢) 大黃(一兩，生用)

上為末，周歲一錢半，水五分，煎四分，溫服。

茅先生治小兒大便不通，目赤，瘡癰癰腫，熱毒心熱，宜服之，大人加用。

大黃(一分) 黑牽牛(半分) 檳榔(一錢半) 朴硝(二錢)

上為末。每服，一字半錢，用蜜熟水調下。

《嬰孺》治小兒大便不得方。

上用半夏一分，炒黃為末，以蜜為丸黍米大。乳服一丸，日再服。此方頻救垂困，功效不可具言。

《嬰孺》治小兒大便不通方。

上杵白花調葵子為末，煮汁服之。

《嬰孺》又方

上用豬脂一斤，水煮，取一升，服五合，日三服，兒小量之。

《嬰孺》又方

上煎蜜，令可索索之，捻如七柄，內下部中二寸許，立通。

《嬰孺》又方

上取羊膽汁灌下部中，須臾通。

《嬰孺》治小兒大便不通，腹滿。**丹參湯方**

丹參 硝石 甘草(炙。各等分，並杵為末)

上以水二升，煮棗三個，三沸，去滓，下末三方寸七，又煮三沸，去滓。五歲兒服五合，不瘥，再服。

《嬰孺》治小兒腹大鳴，及內熱堅不得大便，**更衣大黃丸方**

大黃(七分) 葶藶(四分，炒) 牛黃(三分) 人參 濃朴(炙) 芫花(炒。各二分) 桂心 黃芩(各一分)  
上為末，蜜丸小豆大，飲下三丸，不知加之。

《嬰孺》治小兒胃中熱，更衣起黃赤而難，或四、五日乃大便難乃方。

大黃 甘草(炙) 栝藎(各三分) 大棗(三十個)

上以水二升半，煮一升。每服一雞子許，日進三服。

《嬰孺》治小兒調中利大便**牛黃丸方**

牛黃 大黃 麝香

上三味，等分為末，蜜丸如小豆大。飲下二丸，日再，以利為度。

漢東王先生《家寶》治小兒大腸秘不通兼血痢**金花散方**

皂子仁(一分，炒) 檳榔(一個，生) 甘草(一錢，炙)

上為末。每服一字半錢，沙糖，熟水調下。

張銳《雞峰方》治大便秘結不通方。

上用麻子以水研汁飲之。

《莊氏家傳》治小兒大腸風熱盛不通方。

大黃(一兩) 防風(一兩) 朴硝(二兩)

上件為末，用蜜湯或蔥湯調下。

《孔氏家傳》治小兒大便不通，於硝風散中入鷹條一、二寸遂通。蓋庸醫見小兒大便不通，多服涼藥與疏轉藥，積於中涼轉藥一並發，則其人困矣，此方最佳。

長沙醫者丁時發傳治小兒大便不通方。

大黃(二分，銼碎，炒) 陳皮(一分，去瓢，慢炒)

上二味為末。每服一錢，水八分，煎至五分，去滓。量大小加減服。

《外台》灸法：療小兒大便不通，灸口兩吻各一壯。

《巢氏病源》小兒小便不通利候：小便不通利者，腎與膀胱熱故也。此二經為表裡，俱主水，水行於小腸，入胞為小便，熱氣在其臟腑，水氣則澀，故小便不通利也。

《顛凶經》治孩子小便不通方。

茯苓 通草 冬葵子 車前子(各等分)  
上水四合，藥半兩，煎一合半，作二服(忌油)。

《葛氏肘後》治卒不得溺方。  
上取●灰二刀圭，以酒若米飲服。

《葛氏肘後》又方  
上髮灰，以酒下之。又以少雞子白，亦佳。

《千金》治小兒小便不通方。

車前草(切) 小麥(各一升)  
上二味，以水二升，煮取一升二合，去滓，爛煮粥服，日三、四。

《千金》又方：

上冬葵子一升，以水二升，煮取一升，分服。或入滑石末六錢。

《仙人水鑿》：小兒百日內忽患陰風痰，多殺人，尿不利者，以熱治之，其疾轉甚也。何以知之？孩兒在胎中時，計父母之陰陽毒瓦斯或犯孩兒，生下百日而有斯疾。醫者不辨相源，必言是熱，用冷藥轉之不安，長大成人，遂患陰 之疾，蓋由此也。小兒因此招禍，不亦難乎。其疾，多尿澀及痛，一尿十餘節是也。庸醫多作淋疾，遂與石草、犀角之類，全乖其志，宜須用此方。

附子燒灰使半枚 水精一分力難排 父母手煎添水蛭(一分) 功加須得土衣台(土衣是瓦屋上所生瓦松，取向陽者燒灰用)  
上量兒大小，日數與服之，立見神效。

《外台》劉氏療小兒忽不得小便急悶方。

蔥白(一握) 通草(一兩) 冬葵子(一合)  
上三味切，以水二升，煮取一升，去滓，量服。

《外台》：《廣濟》療小兒熱極病，小便赤澀或不通，尿輒大啼呼。**滑石湯方**

滑石(十六分) 子芩(十四分) 冬葵子(八分) 車前草(切，一升)  
上四味，以水二升，煮取一升，一歲至四歲服一合，日每服，甚良。

《聖惠》治小兒小便不通心悶。**赤芍藥散方**

赤芍藥 瞿麥 木通(銼) 陳橘皮(湯浸, 去白瓢, 炒) 牽牛子(微炒) 冬葵子(以上各一分)  
上件藥搗, 粗羅為散。每服一錢, 以水一小盞, 入蔥白一莖, 煎至五分, 去滓, 不計時候。量兒大小分減服之。

《聖惠》治小兒小便不通, 臍腹防悶, 心神煩熱。**梔子仁散方**

梔子仁(五枚) 茅根(銼) 冬葵根(各半兩) 甘草(一分, 炙微赤, 銼)  
上件藥搗, 粗羅為散。每服一錢, 以水一小盞, 煎至五分, 去滓, 不計時候。量兒大小分減溫服。

《聖惠》又方

滑石(一兩半) 木通(銼) 川芒硝(各三分) 葵子(二合)  
上件藥搗, 粗羅為散。每服一錢, 以水一小盞, 煎至五分, 去滓, 不計時候。量兒大小分減溫服。

《聖惠》治小兒卒小便不通, 小腹急悶。**冬葵子散方**

冬葵子(一兩) 木通(半兩, 銼)  
上件藥搗, 粗羅為散。每服一錢, 以水一小盞, 煎至五分, 去滓, 不計時候。量兒大小分減服之。

《聖惠》治小兒百日內小便不通, 心神煩悶, 臍下痞滿, 宜服**乳煎蔥白飲子方**

蔥白(一莖, 切) 乳汁(三合)  
上二味, 同煎至一合半, 去滓, 分溫為三服, 相去如人行十裡以來, 再服, 以利為度。

《聖惠》治小兒小便不通, 宜用**浸熨湯方**

木通(一兩) 生薑(二兩) 蔥白(七莖) 陳皮(一兩半) 川椒(半兩)  
上件藥都細銼, 以水二大碗, 煎五七沸, 去滓, 傾入盆內, 看冷暖坐兒於盆中浸之, 將滓於兒臍腹下熨之, 立通。

《聖惠》治小兒小便三、兩日不通欲死者。**葵根散方**

葵根(一握, 銼) 壁魚(七枚, 研)  
上以水一大盞煎葵根, 取汁六分, 後入壁魚同煎五、七沸, 去滓, 放溫。量兒大小, 臨時分減服之。

《聖惠》治小兒積熱, 小便不通。**地膚子散方**

地膚子 瞿麥 冬葵子 知母 黃芩 川升麻 木通(銼) 川大黃(銼, 炒) 豬苓(去黑皮, 以上各半兩)  
上件藥搗, 粗羅為散。每服一錢, 以水一中盞, 煎至六分, 去滓, 不計時候。量兒大小分減服之。

《聖惠》治小兒小便不通, 心腹滿悶, 坐臥不安。**滑石散方**

滑石(末) 川大黃(銼, 微炒) 葵子(各半兩) 甘草(一分, 炙微赤, 銼)  
上件藥搗, 粗羅為散。每服一錢, 以水一小盞, 入蔥白三寸, 燈心一束, 煎至六分, 去滓。三、四歲兒服一合。量兒大小, 不計時候, 加減服之。

《聖惠》治小兒小便不通，臍腹堅滿喘急。**木通散方**

木通(銼) 甘草(炙微赤，銼) 葵子(以上各一分) 川大黃(銼碎，微炒) 滑石 牽牛子(微炒。以上各半兩)

上件藥都細搗，羅為散。每服煎蔥白燈心湯調下半錢。量兒大小加減服之，以利為度。

《聖惠》治小兒小便不通，臍腹急痛。**車前散方**

石韋(去毛) 瞿麥(各半兩) 小麥(一兩)

上件藥都銼，以水二大盞，煎至一盞，去滓。取汁一合，調下滑石末半錢。量兒大小以意加減。

《聖惠》又方

冬葵子 滑石 海蛤 蒲黃(以上各半兩)

上件藥搗，細羅為散。每服以蔥白湯調下半錢。量兒大小以意加減。

《聖惠》治小兒小便不通，小腹妨悶方。

上用蔥白一斤，連須細切，煮令熟，以綿裹，於臍下熨之立通。

《聖惠》又方

上用桑螵蛸十枚，炙令黃，搗羅為末。每服以粥飲調下半錢。量兒大小加減服之。

《聖惠》治小兒小便不通，肚痛，**漿水蔥白粥方**

粟米(二合) 蔥白(三七莖，去鬚細切)

上件以漿水煮作稀粥，臨熟投蔥白攪令勻，溫溫食之。

《譚氏殊聖》治小兒小便不通方。

上芥菜子爛研，以紙花貼臍下，相次通妙。

茅先生治小兒小便不通方。

山梔子 滑石(各等分)

上為末，每服半錢，濃煎，燈心湯調下。

《嬰孺》治小兒小便不通**通草湯方**

通草 甘草 滑石(各二兩) 葵子

上以水三升，煮六合。二百日兒服半合，日三，夜一服。

《嬰孺》治小兒小便不通**瞿麥湯方**

瞿麥 石韋(去毛。各一兩) 滑石(二兩) 小麥(二合)

上以水三升，煮一升，服一合，日四服，夜再服。

《嬰孺》治小兒暴不得小便**桃仁湯方**

上用桃仁二十個，去皮尖，以酒一升，煮三沸，去滓，量兒與之。

《嬰孺》治小兒小便不通**滑石散方**

滑石（杵末，以水二升和如薄米泔石末，澄取上汁二停）榆白皮（各一兩）葵子（二兩）  
上切取滑石上汁煮二味，四沸，絞去滓，調水中滑石服之，水中澄得者滑石也。

《嬰孺》治小兒小便不下，熱發腹滿。**麻黃浴湯方**

麻黃 苦參 石膏（各一把）滑石（一升）大黃（五兩）雷丸（四個）秦皮（一兩）  
上用水二斗煮一斗，去滓，放溫浴兒妙，先自臍淋之。

《嬰孺》治小兒小便不通泥臍方。

上用滑石一升，末，以車前草汁和泥泥臍，方廣四、五寸，小覺乾即除之，別上新泥。冬月無車前草汁，只以水和。

《嬰孺》治小兒小便不通方。

葵莖（半升）葵子（一升）

上以水四升，煮取一升，下滑石末一分，研。服半合，日進三服。

《嬰孺》治小兒熱病，小便赤澀不通，尿輒啼呼。**滑石湯方**

滑石（十六分）子芩（十四分）冬瓜子（八分）車前子（一升）通草（十二分）茯苓（五分）  
上以水四升半，煮一升二合。一二歲為三服，百日一合。

**錢乙捻頭散** 治小便不通方。

延胡索 川苦楝（各等分）

上同為細末。每服半錢或一錢，捻頭湯調多少，量下與之。如無捻頭湯，即湯中滴油數點，食前。

張渙 **葵石散方** 治小便不通悶亂。

葵根（一握）滑石 木通（各一兩）牽牛子（半兩，炒）

上件搗為粗末。每服一錢，以水一大盞，入燈心蔥白各少許，煎六分，去滓，放溫服，乳食前。

張銳《雞峰方》治小便不通方。

上用大蒜不以多少，研爛，攤在紙上，臍下貼之。

《聚寶方》治小便不通。

獨顆大蒜（一枚，用豆）鹽花（少許）山梔子（三七枚）

上用味爛搗，攤紙花子上，貼臍良久通。末間，更塗陰囊上，立通。

《莊氏家傳》治小兒小便不通方。

上用白礬為末。每服一錢，溫漿水調下。

長沙醫者丁時發傳石韋散 治小兒小便不通方

石韋(去皮) 瞿麥 滑石 甘草(各一兩) 燈心(一把)

上為末。每服一錢，水八分，小麥一百粒。同煎五分去滓，溫服。量兒大小加減。

## 大小便不通利第八

《巢氏病源》小兒大小便不利候：小兒大小便皆不利者，臟腑冷熱不調，大小腸有游氣，氣壅在大小腸，不得宣散，故大小便壅澀不流利也。

翰林待詔楊大鄴問小兒大小便秘澀者為何？答曰：乳食失度，使之四大不調，滋味有貪，遂乃五臟受病，甘甜聚食，鹹酸滯涎，食滯留結於胃腸，風壅漬癖於心肺，氣脈不順，水穀不行。雖不逆於不焦，即秘結於下部。小兒不知疼痛，莫說因由，驚啼叫以頻頻，但怒脹而不乳，不知孩兒痛刺連臍，則面色青黃，但按脈息與治，若不見病源，只依外變用藥，必克安效。

《千金》治小兒大小便不通方。

上搗白花胡葵子末，煮汁服之。

《千金》又方

上末雞屎白服一錢七。

《外台》：《必效》主小兒大小便不通妨悶方。

上用白蜜一合，以鐺中煎為丸，內下部中即通。小便不通嚼生蔥，以綿裹少許納小便道中，即通。

《子母秘錄》治小兒大小便不通方。

上用峰房燒末，酒服一錢，日再服。

錢乙郁李仁丸 治襁褓小兒大小便不通，驚熱痰實，欲得漉動者方。

郁李仁(去皮) 川大黃(去粗皮，取實者，銼，酒浸半日控乾，炒為細末。各一兩) 滑石(半兩，研細)  
上先將郁李仁研成膏，和大黃、滑石丸如黍米大。量大小與之，以乳汁或薄荷湯下，食前服。

錢乙犀角丸 治小兒風熱痰實、面赤，大小便秘澀，三焦邪熱，腑藏蘊毒，疏導極穩方。

生犀(末，一分) 人參(去鬚，切) 枳實(去瓢，炙) 檳榔(半兩) 黃連(一兩) 大黃(二兩，酒浸切片，以巴豆去皮一百個，貼在大黃上，紙裹，飯上蒸三次，切，炒令黃焦，去巴豆不用)

上為細末，煉蜜和丸如麻子大。每服一二十丸，臨臥熟水下，末動加丸數。亦治大人，孕婦無損。

《惠眼觀証》芍藥散 治大小便下藥不通者方。

芍藥 大黃 甘草(炙) 當歸 朴硝(各一分)

上為末。每服一大錢，水一盞，瓦器中煎至半盞，去滓，服即通。

《吉氏家傳》治大小便不通方。

甘草節(炒) 槐花(洗。各一兩)  
上件末。每服一錢，茶半錢，點湯下。

吉氏又方

滑石(一大錢) 燈心(一握)  
上以水二碗，煎至一盞，溫服。

《千金》灸法：小兒大小便不通，灸兩口吻，各一壯。

## 大便失禁第九

《千金》治老人小兒大便失禁，灸兩腳大指去甲一寸，三壯。及灸大指奇間，各三壯。

## 小便數第十

《巢氏病源》小兒小便數候：小便數者，膀胱與腎俱有客熱乘之故也。腎與膀胱為表裡，俱主水；腎氣下通於陰。此二經俱受客熱，則水行澀，故小便不快而起數也。

張渙 雞腸散方 治因膀胱有熱，服冷藥過多，小便不能禁止，或遺尿病。

雞腸草(一兩) 牡蠣粉(三分) 龍骨 麥門冬(去心焙) 白茯苓 桑螵蛸(各半兩)  
上件藥搗為粗散。每服一錢，水一小盞，入生薑少許，棗二枚，煎至六分，去滓，溫服。量兒大小加減。

## 大便青第十一

《聖惠》：夫小兒大便青者，因驚氣及脾氣不和，大腸虛冷，乳食不消，冷氣搏於糟粕，故令大便青色也。

《聖惠》治小兒大腸虛冷，乳食不消，大便青色。白朮丸方

白朮 白芍藥 木香 當歸(銼，炒。各一分) 麝香(一錢，細研)  
上件藥搗，羅為末，煉蜜和丸如綠豆大。每服以粥飲研下五丸，日三服。量兒大小以意加減。

《聖惠》治小兒內冷，腹脅妨悶，大便青色，不欲乳食。訶黎勒丸方

訶黎勒(一兩) 白茯苓 當歸(銼，炒。各一分) 白朮 白芍藥 陳皮(焙) 濃朴(去皮，薑汁炙令香熟)  
甘草(炙。以上各半兩)  
上件藥搗，羅為末，煉蜜和丸如梧桐子大。三歲兒每服以粥飲研下五丸，日三服。量兒大小以意加減。

《聖惠》治小兒內冷大便青，不欲食，皆是胎寒。陳皮丸方

陳皮(湯浸, 去白瓢, 焙) 當歸(炒) 人參 白芍藥 芎 (各半兩) 甘草(一分, 炙, 銼)  
上件藥搗, 羅為末, 煉蜜和丸如綠豆大。三歲兒每服以溫粥飲下七丸, 日三服。量兒大小以意加減。

《聖惠》治小兒胎寒腹痛大便青。木香丸方

木香 蓬莪朮 白朮 人參 當歸(銼, 炒。以上各半兩) 麝香(細研) 白芍藥(各一分)  
上件藥搗, 羅為末, 都研令勻, 煉蜜和丸如綠豆大。三歲兒, 每服以溫粥飲下七丸, 日三服。量兒大小以意加減。

《聖惠》治小兒胎寒腹痛, 大便青。芎 丸方

芎 黃耆(銼) 蟲(各三分) 牛黃(細研) 當歸(銼, 炒。各半兩) 麝香(細研) 白芍藥(各一分)  
上件藥搗, 羅為末, 都研令勻, 煉蜜和丸如麻子大。每服以粥飲下五丸, 日三服。量兒大小以意加減。

《聖惠》治小兒大便青不欲食, 皆是胎寒。當歸丸方

當歸(銼, 炒) 人參 白芍藥 芎 (各半兩) 甘草(一分, 炙)  
上件藥搗, 羅為末, 煉蜜和丸如麻子大。每服以乳汁下三丸, 日三服。量兒大小以意加減。

《吉氏家傳》治小兒驚瀉青屎方。

上用朱砂米粒大, 細研, 入輕粉少許, 荊芥湯一茶腳調下。

## 小便白第十二

《莊氏家傳》小兒尿作白米泔狀, 未必皆疳, 乃膈熱所作方

越桃一枚(即山梔子也)

上同燈心二十莖, 煎湯細呷, 即尿清。

《吉氏家傳》治心藏熱, 口瘡目赤, 尿如米泔。金露散方

鬱金(半兩) 甘草(銼, 二兩) 滑石(半錢)

上細末。每服一字, 冷, 麥門冬熟水調下。

## 小便淋瀝第十三

《巢氏病源》小兒諸淋候：小兒諸淋者，腎與膀胱熱也。膀胱與腎為表裡，俱主水。水入小腸下於胞，行於陰，為小便也。腎氣下通於陰，陰，水液之道路。膀胱，津液之腑。膀胱熱，津液內溢而流於澤，水道不通，水不上不下，停積於胞，腎氣不通於陰。腎熱，其氣則澀，故令水道不利。小便淋瀝，故謂為淋。其狀：小便出少起數，小腹急痛引臍是也。又有石淋、氣淋、熱淋、血淋、寒淋、諸淋，形証隨名，具說於後章，而以一方治之者，故謂諸淋也。

茅先生小兒生下有諸般淋瀝。砂石淋所出砂石，此腎中有客熱。冷淋，遺下白色，時時滴瀝，此下焦極冷。熱淋，澀痛不出，此腎中有客風。血淋如血，此五臟甚熱，熱極之候。其所治前件諸淋，用滑石

散夾羊灰散與服即愈(二方並見本門中)。如調理冷淋，要夾溫藥與服。如見面黑色，肚膨脹，不進食，惡叫唇縮，死候不治。

張渙謹按：小兒小便淋澀，與大人無異，亦由膀胱有熱所致。諸淋難澀，甚者，臍下妨悶，心神煩熱。

《嬰童寶鑑》：小兒淋者，膀胱積熱，尿莖不通，乃淋澀痛也。

《嬰童寶鑑》：小兒尿時啼哭，而尿少者，緣氣滯膀胱，莖中澀痛者，淋也。

《玉訣》小兒淋澀候歌：

小便淋澀膀胱熱，氣滯因風腸裡結。聚積胞中砂石淋，熱極氣攻還變血。此候解熱，利下小腸風毒妙矣。

又一云：此患利小便，去風毒，即無誤也。

又一《玉訣》小兒淋澀候歌一同，云：先與薑黃散，(方見血淋門，《鳳髓經》方同。)次與石韋散(方見本門)利小便，通心氣。

《石壁經》三十六種內五種淋澀候歌：

五淋之病熱相傳，一一須分病本源。或即叫啼生水積，忽然餐食在脾間。次後複還歸腎臟，至今淋澀小便。但觀眼尾紅筋見，(一云：但看眼尾紅雲見。)有血相和汗不乾。(一云：青筋垂至耳旁邊。)肚上青筋垂至腹，(《鳳髓經》云：垂至伏，注云：伏，乃陰囊也。定知砂石痛難安。兩唇乾燥如皮退，(四十八候，此一句：舌上如同粟米樣。)此是風淋定惡痊。下陰不腫氣不急，下陰才腫氣相煎。先與寬腸海金散，(《鳳髓經》云：先與寬腸散子吃。)必能通達使安全。

此因膀胱熱使然也，或熱逼水聚結砂石，若肺經氣滯，使小腸不分，亦為淋疾。脾積而飲食不足，亦為此疾。治當去膀胱毒瓦斯，次寬胞，脹即愈也。(海金散方見本門。)

《鳳髓經》歌括一同，有注云：血淋宜與薑黃散(方見血淋門)，熱淋宜與石韋散(方見本門玉訣方同。)

《千金》地膚子湯 治小兒熱毒入膀胱中，忽患小便不通，欲小便則澀痛不出，出少如血，須與複出方。

地膚子 瞿麥 知母 黃芩 枳實(麩炒) 升麻 葵子 豬苓(各六銖) 海藻 橘皮 通草(各三銖) 大黃(十八銖)

上十二味 咀，以水三升，煮取一升。一日至七日兒一合為三服；八日至十五日兒，一合半為三服；十六日至二十日兒，二合為三服；四十日兒，以此為準；五十日以上，七歲以下，以意加藥益水。

《千金》治小兒淋方。

上用車前子一升，水二升，煮取一升分服。

《千金》又方

上煮冬葵子汁服之。《聖惠》以冬葵子為散，水煎服。

《千金》又方

上取蜂房、亂髮燒灰，以水服一錢七，日再。

《千金》治淋痛方。

上用豬脂酒服三合，日三。小兒服一合，臘月者。

《聖惠》：煉臘月豬脂，去滓。每服一栗殼，暖酒一合，攪勻空心午間各一服。

陶隱居及《圖經》小兒淋閉方。

上以衣魚摩臍及小腹，即溺通也。

《聖惠》治小兒諸淋，臍下妨悶，心神煩熱。**石燕丸方**

石燕(細研) 瞿麥 梔子仁 滑石(細研) 木通(銼) 葵子 海蛤(細研。以上各半兩)

上件藥搗羅為末，煉蜜和丸如綠豆大。每服以蔥白湯下七丸，日三四服。量兒大小以意加減。

《聖惠》治小兒諸淋澀，水道中痛，臍下痞滿。**石韋散方**

石韋(去毛) 葵子 木通(銼) 赤茯苓 車前子 瞿麥 榆白皮(銼。以上各半兩) 滑石(一兩)

上件藥搗，粗羅為散。每服一錢，以水一小盞，入蔥白五寸，煎至六分，去滓，分為二服。如人行十裡，再服。量兒大小以意加減。

《聖惠》治小兒諸淋，及熱結赤澀不通。**木通散方**

木通 桑根白皮(各銼) 冬葵子 川芒硝(各一分) 滑石(半兩)

上件藥搗，細羅為散。每服以蔥白湯調下半錢，日三四服。量兒大小以意加減。

《聖惠》治小兒諸淋澀痛不利。**石韋散方**

石韋(去毛) 赤芍藥 川大黃(銼，微炒) 麥門冬(去心，焙) 甘草(炙微赤，銼) 川升麻 川朴硝(以上各一分)

上件藥搗，粗羅為散。每服一錢，以水一小盞，煎至六分，去滓，不計時候。量兒大小分減服之

《聖惠》治小兒諸淋澀，臍下連兩膀胱妨悶及大腸氣壅。**牽牛子丸方**

牽牛子(微炒) 川大黃(銼，微炒) 川升麻 郁李仁(湯浸，去皮，炒，研入) 川朴硝(各半兩) 滑石 海蛤(各一兩。細研)

上件藥搗，羅為末，煉蜜和丸如綠豆大。每服用溫水研下七丸，日三四服。量兒大小以意加減。

《聖惠》治小兒諸淋澀，心煩悶亂。**車前子散方**

車前子 麥門冬(去心) 石燕(各半兩)

上件藥搗，粗羅為散。每服一錢，以水一小盞，煎至五分，去滓，不計時候。量兒大小分減溫服。

《聖惠》又方

冬葵子(一兩) 瞿麥(半兩)

上件藥搗，粗羅為散。每服一錢，以水一小盞，煎至六分，去滓，不計時候。量兒大小分減溫服。

《聖惠》又方

上取小豆葉，搗絞取汁。每服一合，量兒大小分減服之。

茅先生治小兒諸般淋滑石散方

滑石(末) 地龍(去土)

上二味等分為末。每服半錢一錢，用燈心、通草、甘草煎湯調下

茅先生治小兒諸淋羊灰散方

上用 羊須，燒灰為末。每服一錢，用熱酒調下。

《嬰孺》治小兒、大人淋。葵子湯方

陳葵子 石韋(去毛。各三分) 棗(三十個，去核) 滑石(八兩)

上以水五升，煮三升。一服一升，小兒減服。

《嬰孺》又方

滑石(一分半) 石韋(去毛，二分)

上為末，醋水服一刀圭，大人二方寸匕。

《嬰孺》治小兒小便赤澀。車前湯方

車前草汁(七合) 冬瓜汁(五合)

上相合，一、二歲為四服；三、四歲為三服；百日兒一合。

漢東王先生《家寶》治小兒小便淋澀不通。如聖散方

海金砂 滑石(各一錢)

上為末。每服一字或半錢，煎燈心湯調下。

張渙 石燕丹方 治小便淋澀痛悶。

石燕(燒赤，醋淬，放冷細研) 瞿麥 滑石(各一兩) 木通(銼) 海蛤(細研。各半兩)

上件搗，羅為細末，煉蜜和丸黍米大。每服十粒，以蔥白湯下，食前。量兒大小加減。

張渙 石韋散方 治諸淋澀水道中痛，臍下妨悶。

石韋(一兩, 去毛) 冬葵子 木通(銼) 赤茯苓(各半兩) 車前子 瞿麥 榆白皮(銼) 滑石 甘草(各一分)

上件藥, 搗羅為散。每服一錢, 以水一小盞, 入蔥白五寸, 煎至六分, 去滓, 溫服。如人行十裡再服。量兒大小加減。

張渙 葵子散方 治腎熱水結, 化瀉有淋。甚者, 水道中澀痛不可忍。

冬葵子(一兩) 石楠 榆白皮(銼) 石韋(去毛) 木通(銼。以上各半兩)

上件藥搗, 羅為散。每服半錢, 以蔥白湯下, 日二服。量兒大小加減。

張渙又方滑石散

滑石 栝萎根 石韋(去毛。各一兩)

上件藥搗, 羅為散。每服半錢, 煎大麥飲清調下, 日二服。量兒大小加減。《聖惠》專治石淋。

張渙 朱砂散方 治心神煩躁, 小便赤澀不通。

朱砂(別研細, 一兩) 滑石 犀角(屑。各半兩) 黃芩 甘草(炙微赤, 銼) 車前子(各一分)

上件藥搗, 羅為散, 入朱砂同拌勻。每服半錢, 煎竹葉湯調下, 食前。

《嬰童寶鑒》治小兒淋澀滑石散方

滑石 瞿麥 葵子(炒) 芸苔子 甘草(炙) 山梔仁 鬱金 海金砂(各一分, 末)

上件研勻, 用燈心、蔥湯調下半錢。

《九 衛生》寸金散

蒲黃 滑石(各一分)

上同為細末。每服一錢, 煎燈心湯調下, 沙糖水亦妙。

《聚寶方》通神散 治小兒五疳淋方。

石燕子(一枚, 先為細末, 再研) 石韋(半兩)

上二味為細末。每服一字, 煎三葉酸漿草湯調下。甚者再三服, 瘥。忌生冷油膩。

《玉訣》石韋散 通小便淋熱澀痛方。

石韋(去毛) 瞿麥 海金砂 滑石 木通 甘草(炙。以上各等分)

上為末。每一錢, 炒燈心煎湯調下。

《三十六種》治五淋車前子散方

車前子 滑石

上等分為末, 粥飲調下。

《三十六種》治五淋**朴硝散方**

朴硝(三分, 別研) 滑石(半兩) 甘草(炙, 二錢)  
上為末。每服半錢, 蔥湯調下。

《四十八候》治五淋**海金散方**

海金砂(二錢) 滑石 甘草(炙) 扁竹 鬱金(皂角煮三五次。以上各一錢) 木通 瞿麥 大黃(蒸。各一分)  
上細末。每服一錢, 煎木通湯下。風淋, 蔓荊子湯; 冷淋, 白薑湯, 日進三服。

《吉氏家傳》治淋瀝兼醫瘡毒。**甘露散方**

石膏 寒水石(各二兩) 甘草(一兩, 炙)  
上件為末。每服半錢, 井華水調下, 米泔亦得。

《米氏家傳》治小兒小便不利澀痛。**白附子散方**

白附子 滑石(各末。等分)  
上件以酸漿子汁調下。

長沙醫者鄭愈傳治淋瀝**通神散方**

石燕子(一個, 去 ) 石韋(一分) 海金砂 木通(各二錢)  
上為末。每服一錢, 酸漿草湯下甚妙。不過三服。

長沙醫者鄭愈傳治小兒小便結熱澀淋等退熱**梔子散方**

梔子仁(七個) 芍藥(二錢) 木通(三錢)  
上為粗末。每服二錢, 入燈心三兩條, 水一盞, 煎至七分, 去滓, 溫服。

## 石淋第十四

《巢氏病源》小兒石淋候：石淋者，淋而出石也。腎主水，水結則化為石，故腎容砂石。腎為熱所乘，熱則成淋。其狀小便莖中痛，尿不能卒出，時自痛引小腸，膀胱裡急，砂石從小便道出。甚者，水道塞痛，令悶絕也。

《葛氏肘後》小兒淋若石淋方。

上散，牯牛陰頭毛燒末，以醬汁一服一刀圭，日再之。

《外台》文仲療小兒淋兼石淋方。

榆皮 瞿麥(各六分)  
上二味切，以水一升，煮取半升，去滓，分溫服之。

《外台》文仲又方

小麥(一合) 蔥白(一握)

上二味, 以水一升煮, 去滓, 取一半分服之。

《聖惠》治小兒石淋, 水道中澀痛不可忍。葵子散方

冬葵子 石楠 榆白皮(銼) 石韋(去毛) 木通(銼。以上各半兩) 滑石(一兩, 細研)  
上件藥搗, 細羅為散。每服以蔥白湯調下半錢, 日三、四服。量兒大小以意加減。

《聖惠》又方

滑石(二兩) 石韋(去毛) 子芩(各三分)

上件藥搗, 細羅為散。每服以粥飲調下半錢, 日三、四服。量兒大小以意加減。

《聖惠》治小兒石淋澀痛心煩方。

甘草(炙微赤, 銼) 乾薑(炮製, 銼。各一兩) 雞糞白(半兩, 微炒)

上件藥搗, 細羅為散。每服煎小麥飲調下半錢, 日三、四服。量兒大小加減服之。

《聖惠》治小兒五、七歲石淋, 莖中有砂石不可出者, 宜服雞糞白散方

上用雞糞白一兩, 炒令黃, 搗、細羅為散。以水一大盞, 露一宿。每服用此水一合, 調散半錢服之。日三、四服, 當下砂石。量兒大小以意加減。

《聖惠》又方

上搗細瞿麥一兩, 羅為散。每服以溫酒調下半錢, 日三、四服。量兒大小以意加減。

《聖惠》又方

上以桃膠半兩, 熱湯一中盞, 化膠令消, 去滓。量兒大小分減頻服。

《嬰孺》治小兒石淋, 小便難方。

上蠅屎以飲, 服一刀圭。

《嬰孺》治小兒石淋、氣淋。桂心散方

桂心(一分) 蜂房(二分)

上為末, 酒或麥汁服一刀圭。

《吉氏家傳》石韋散 治小兒風熱。砂石淋方

石韋(去毛) 海金砂 木通 滑石(以上各等分)

上為末。每半錢或一錢, 瞿麥湯下。

《巢氏病源》小兒氣淋候：氣淋者，腎虛，膀胱受肺之熱氣，氣在膀胱，膀胱則脹。肺主氣，氣為熱所乘，故流膀胱。膀胱與腎為表裡。膀胱熱，則氣壅不散。小腹氣滿，水不宣利，故小便澀成淋也。其狀膀胱小腹滿，尿澀，常有餘瀝是也。亦曰氣癰，診其少陰脈數者，男子則氣淋也。

#### 《集驗方》治氣淋抵聖散

赤芍藥(一兩，生) 檳榔(一個，面裹煨黃)  
上為末。每服一錢，水一盞，煎七分，空心日三服。立瘥。兒小分減服。

《嬰孺》治小兒氣癰方。

上用牯牛陰聚毛灰，研，以溫米飲服一刀圭，日再。其疾立瘥。

### 熱淋第十六

《巢氏病源》小兒熱淋候：熱淋者，三焦有熱氣，傳於腎與膀胱，而熱氣流入於胞而成淋也。

《聖惠》：夫小兒小便赤澀不通者，由膀胱與腎俱有熱故也。腎主於水，膀胱為津液之腑。此二經為表裡。而水行於小腸，入於脬為小便，今臟腑有實熱，熱行於脬，故令小便赤澀不通也。

《聖惠》治小兒壅熱，小便赤澀不通，水道中澀痛不可忍。子芩散方

子芩 冬葵子 車前子 茅根(銼。各一兩) 滑石(二兩)  
上件藥搗，粗羅為散。每服一錢，以水一小盞，煎至六分，去滓，不計時候。量兒大小，以意分減服之。

《聖惠》治小兒臟腑壅熱，心神煩躁，小便赤澀不通。大青散方

大青 川升麻 瞿麥 甘草(炙微赤，銼) 黃芩(各半兩) 川大黃(銼，微炒) 川朴硝 滑石(各三分)  
上件藥搗，細羅為散。每服不計時候，以溫水調下半錢。看兒大小以意加減。

《聖惠》治小兒心臟熱盛，煩躁不安，小便赤澀不通。朱砂散方

朱砂 鉛霜(各細研) 犀角(屑) 黃芩 甘草(炙微赤，銼) 車前子(各一分) 滑石(細研) 川朴硝(各半兩)

上件藥搗，細羅為散。入研了藥，令勻。不計時候，煎苦竹葉湯下半錢。看兒大小以意加減。

《聖惠》又方

冬葵子(三分) 滑石(細研，三分) 梁上塵 黃芩 甘草(炙微赤，銼。各半兩)  
上件藥搗，細羅為散。不計時候，煎蔥白燈心湯調下半錢。量兒大小以意加減。

《聖惠》又方

生地黃汁(二合) 牛蒡葉汁 蜜(各一合)  
上件藥相和令勻。每服一合，調下滑石細末半錢。臨時看兒大小加減服之。

《聖惠》治小兒熱極，小便赤澀不通，尿輒大啼，水道中痛。**滑石散方**

滑石(一兩) 子芩 車前子 赤茯苓(各半兩) 冬葵子 木通(銼。各三分)

上件藥搗，粗羅為散。每服一錢，以水一小盞，煎至五分去滓。不計時候。量兒大小分減溫服。

《聖惠》治小兒小便赤澀，服藥即通，無藥即澀，宜服**車前子散方**

車前子 子芩 赤茯苓 琥珀(以上各一兩) 滑石(二兩) 木通(三分，銼) 甘草(半兩，炙微赤，銼)

上件藥搗，粗羅為散。每服一錢，以水一小盞，煎至五分，去滓，不計時候。量兒大小分減溫服。

《聖惠》治小兒小便赤澀不通，宜服此方

滑石(二兩) 木通(一兩) 葵子(一合)

上件藥搗，粗羅為散。每服一錢，以水一小盞，煎至五分，去滓，不計時候。量兒大小分減溫服。

## 血淋第十七

《巢氏病源》小兒血淋候：血淋者，是熱之甚。甚者則尿血，謂之血淋。心主血，血之行身，通遍經絡，循環腑臟。其熱甚者，血即散失其常，經溢滲入胞，而成血淋矣。

《聖惠》：夫小兒血淋者，是熱淋之甚，則變成血淋也。心主於血，血之行身，通於膀胱，而熱氣流入於脬，即成血淋矣。

《聖惠》治小兒血淋澀痛，心躁體熱。**犀角屑散方**

犀角(屑) 黃芩 石韋(去毛) 當歸(銼) 赤芍藥(以上各半兩) 蒲黃(一兩)

上件藥搗，粗羅為散。每服一錢，以水一小盞，入生地黃半分，青竹茹半分。煎至六分，去滓，不計時候。量兒大小分減服之。

《聖惠》又方

車前子 茅根(銼。各一兩)

上件藥搗，粗羅為散。每服一錢，以水一小盞，入生地黃一分，煎至六分，去滓，不計時候。量兒大小分減服之。

《聖惠》治小兒血淋，日夜淋澀，小腹及陰中疼痛。**露蜂房灰散方**

露蜂房(灰) 亂髮(灰。各一分) 滑石(一兩) 海蛤(半兩)

上件藥都細研為散。不計時候，以溫水調下半錢。量兒大小以意加減。

《聖惠》又方

榆白皮(銼) 瞿麥 蒲黃(以上各半兩)

上件藥搗，粗羅為散。每服一錢，以水一小盞，煎至六分，去滓。不計時候，分溫二服。

### 《聖惠》又方

車前葉(汁) 冬瓜(汁) 蜜(各一合)  
上件藥相和令勻，看兒大小分減服之。

### 《聖惠》又方

石韋(一兩，去毛) 白膠(炙令黃燥) 戎鹽(各半兩)  
上件藥搗，粗羅為散。每服一錢，以水一小盞，煎至五分，去滓。不計時候。量兒大小分減溫服。

### 《聖惠》又方

上用牯牛陰聚毛，燒灰細研，不計時候，以粥飲調下半錢。量兒大小加減服之。

### 《聖惠》又方

上用蜥蜴一枚，燒灰細研為散。不計時候，以溫酒調下半錢。量兒大小加減服之。

《譚氏殊聖》方：小兒淋病最愁人，驚痛連心不暫停。尿血有時三兩滴，忽然驚叫不堪聽。石韋石燕酸漿草，立便通流保再生。

### 通神散

石燕子(一個) 石韋(半兩，共為末)  
上煎，醋草子湯下。甚者三服，大人半錢，小兒一字。醋草子即酸漿草也。

張渙 蒲黃散方 治膀胱熱甚血淋，水道澀痛。

蒲黃 冬葵子 生地黃(各半兩)  
上件藥搗，粗羅為細末。每服一錢，以水一大盞，煎至六分，去滓溫服。量兒大小加減。

《鳳髓經》薑黃散 治小兒血淋方。

上薑黃一味，為細末。每服半錢，酒調下，日進三服。若通利，不可再服。

《吉氏家傳》治便血並血淋方。

黃芩 巴戟 菊花 白朮(各等分)  
上件為末。用燈心煎湯，同麝香臘茶下二錢。

長沙醫者丁時發傳薑黃散 治血淋方。

上薑黃末半錢或十字，輕粉少許相和，沙糖水調下。

## 寒淋第十八

《巢氏病源》小兒寒淋候：寒淋者，其病狀，先寒顫，然後尿是也。小兒取冷過度，下焦受之，冷氣入胞，與正氣交爭，寒氣勝則顫寒，正氣勝則顫寒解，故得小便也。

《集驗方》治小便寒淋不禁。

赤茯苓 肉桂(各半兩。去皮)

上為末，用稀糊丸如綠豆大。每服五十丸，熟水下，不拘時候。兒小量之。

宋義叔和參八味丸 治陰虛小便難並寒淋方。

熟乾地黃(八兩) 山藥 山茱萸(各四兩) 澤瀉 赤茯苓 牡丹皮(各三兩) 桂(去皮) 附子 元參 赤芍藥(各二兩)

上末之，煉蜜丸桐子大。每服三十丸，煎赤茯苓湯下，日二。兒小者，丸如綠豆大。每服量大小十丸、二十丸。

## 痔疾第十九

《巢氏病源》痔候：痔有牡痔、牝痔、脈痔、腸痔、血痔、酒痔。皆因勞傷過度，損動血氣所生。小兒未有虛損而患痔，止是大便有血出，腸內有結熱故也。

《聖惠》治小兒痔疾，肛邊生結核，疼痛寒熱。鱉甲散方

鱉甲(塗醋炙令黃，去裙) 皮(炙令黃。各一兩) 蛇蛻皮(燒灰) 檳榔(各三分) 露蜂房(半兩，微炙) 麝香(一分，細研) 豬懸蹄甲(七枚，炙令焦)

上件藥搗，細羅為散，入麝香都研令勻。每服食前以粥飲調下半錢。量兒大小加減服之。

《聖惠》治小兒久不瘥痔疾，肛邊癢痛。桑木耳散方

桑木耳(微炒) 槐耳(微炙) 皮(炙令黃) 當歸(銼，微炒) 羌活(以上各半兩) 枳殼(一兩，麩炒微黃，去瓢)

上件藥搗，細羅為散。每服以粥飲調下半錢，日三、四服。量兒大小加減服之。

《聖惠》治小兒痔疾下血無時。藤子散方

藤子(一枚，去殼微炙) 牛角(灰，一兩) 皂莢子(一百枚，與藤子瓢同以酥炒令黃) 醋石榴皮(灰，半兩)

上件藥搗，細羅為散。每服以溫酒調下半錢，日三、四服。量兒大小加減服之。

《聖惠》治小兒痔疾結硬，痛不止。龜甲散方

龜甲(二兩，塗醋炙令黃) 蛇蛻皮(燒灰) 豬後懸蹄甲(微炙焦。各一兩) 露蜂房(半兩，微炙) 麝香(一分，細研)

上件藥搗，細羅為散。入麝香都研令勻。每服以溫酒調下半錢。日三、四服。量兒大小加減服之。

《聖惠》治小兒痔疾下血不止，熱毒瓦斯流注，發歇疼痛。槐鵝散方

槐鵝 側柏(炙微黃) 荊芥穗 棕櫚(燒灰) 黃牛角(燒灰) 牛膝(去苗。各半兩)

上件藥搗，細羅為散。每服以粥飲調下半錢，日三、四服。量兒大小加減服之。

《聖惠》治小兒痔疾下血，大腸疼痛。**皮散方**

皮(炙令黃) 枳殼(麩炒，微黃去瓢) 木賊 當歸(銼，微炒) 槐鶻(微炙。各一兩)  
上件藥搗，細羅為散。每服以粥飲調下半錢，日三、四服。量兒大小加減服之。

《聖惠》治小兒痔疾下血不止。**雞冠花散方**

雞冠花(焙令香) 羌活(各一兩) 棕櫚(一兩，燒灰)  
上件藥搗，細羅為散。每服以粥飲調下半錢，日三、四服。量兒大小加減服之。

《聖惠》治小兒痔疾下血不止。**黃耆散方**

黃耆(銼) 枳殼(麩炒微黃，去瓢) 側柏葉(炙微赤，銼，各一兩)  
上件藥搗，細羅為散。每服以粥飲調下半錢，日三、四服。量兒大小加減服之。

《聖惠》治小兒痔疾下血，發歇不定方。

荊芥 枳殼(麩炒，微黃去瓢) 薄荷(各一兩)  
上件藥搗，細羅為散。每服以粥飲調下半錢，日三、四服。量兒大小加減服之。

《聖惠》治小兒痔疾痛不可忍。**木賊丸方**

木賊(一兩) 藤子(二枚，去殼，塗醋炙黃) 烏賊魚骨(二兩)  
上件藥搗，羅為末，煉蜜和丸如綠豆大。不計時候，以溫酒下五丸。看兒大小以意加減。

《聖惠》治小兒痔疾疼痛，腫硬不消，宜用**坐藥方**

蛇床子 荊芥(各末。半兩) 蝸牛(二七枚)  
上件藥爛研，塗在紙上。每發時，先用白礬熱水洗痔頭子後，用被褥上安藥紙，坐三兩上，瘥。

《聖惠》治小兒痔生肛邊，如鼠乳，及成瘡，痛楚至甚，宜服**穿山甲散方**

穿山甲(二兩，炙令黃) 麝香(半分，細研)  
上件藥搗，研令勻細。每於食前，煎黃 湯調下半錢。量兒大小加減服之。

《聖惠》治小兒痔，下血不止，肛邊生鼠乳，疼痛。**檉樹茵子丸方**

檉樹茵子 黃牛角(炙。各一兩) 葫荑子(一合) 蝦蟆 鰻鱧魚頭(各一枚。炙令黃)  
上件藥搗，羅為末，以水煎白膠香和丸，如彈子大。用瓶內如裝香法，燒一丸，熏下部瘥。

《聖惠》治小兒痔疾，下部癢悶。**熨藥方**

枳實(二兩，炙炒微黃) 鬼箭羽 木香 鬼柏(以上各一兩)  
上件藥搗，粗羅為散。以頭醋和勻，炒令熱，用青布裹熨，日二用之。

《聖惠》治小兒痔疾，鼠乳生肛邊。煩熱，疼痛。**槐子丸方**

槐子(微炒) 黃芩(各一兩) 藤子(二枚, 去殼, 炙令黃)

上件藥搗, 羅為末, 以水浸, 蒸餅和丸如綠豆大。每服以桑耳湯下五丸, 日三、四服。量兒大小加減服之。

《聖惠》治小兒腸痔, 下血不止方

上用 藤子三枚, 大者以七八重濕紙裹煨, 良久脹起, 取去殼用肉, 細切碾羅為散。每服以黃 湯調下半錢, 量兒大小加減服之。

《聖惠》又方

上用牛角 二兩, 炙令黃焦, 搗、細羅為散, 每於食前, 以溫酒調下半錢。量兒大小加減服之。

《聖惠》又方

上細銼, 皮一枚, 於瓶內燒煙, 熏痔上癢。

張渙治小兒痔疾, 皆由勞傷過度, 損動血氣, 其裡有蟲, 甚微難見。皮散方

皮(燒灰) 蟹甲(塗醋炙黃, 去裙 ) 蛇蛻皮(燒灰。各一兩) 露蜂房(半兩, 微炙)

以上搗, 羅為細末, 次入麝香(一分)。

上件同拌勻。每服半錢, 米飲調下。量兒大小加減。

張渙又方棕櫚散

棕櫚(燒灰) 荊芥(去枝梗) 側柏(炙黃。各一兩) 牛膝 枳殼 黃 (各半兩)

上搗, 羅為細末。每服半錢, 米飲調下, 乳食前。

《王氏手集》治腸風下血, 或成痔疾。烏金散方

槐花(銀石器乾炒紫色, 秤一兩) 枳殼(面炒, 去瓢, 秤二分) 荊芥穗(去皮梗, 秤半兩)

上件搗, 羅為細末。每服一錢, 米飲調下, 兒小半錢。

長沙醫者丁時發傳治小兒痔疾下血, 大腹疼痛。皮散方

皮(炙) 枳殼(麩炒) 當歸 槐花(微炙) 木賊(各一兩)

上件為末。每服半錢, 用米飲調下, 一日三服。